

San Pablo Colosas vu'ejoopo pa'inare chu'o tocha saosi'ea'me

Chu'o saosi'ea'me

¹⁻² Chu'ũ, Pablo, Diopi chiiuna Jesucristo saosi'kupi ija'ova utija'ova mai majapãiũja'ũ Timoteona'me tocha saomũ musanũkonare, Colosas vu'ejoopo pa'inare, re'oja'che pa'ijũ Cristo'te cho'оче masi cho'okainajejũ chũkũna majapãijanare. Mai Ja'kũ Diopi musanũkona rekoñõãna re'oja'che pa'iche'te cho'okaiũna re'oja'che pa'ijũ'ũ.

Jesure cuasanare Pablo Diore sũekaiche'te kuamũ

³ Chũkũna musanũkonani sũekaijũ Maire Paakũ Jesucristo Pũka'kũre Diore si'arũmũ, "Re'orepamũ, Ja'kũ", chiijũ pa'ime. ⁴ Musanũkona Jesucristoni masi cuasajũ chekũnare Dios neenare ũcuaukore oijũ re'oja'che cho'okaijũ pa'iche asasinaa'me chũkũna. ⁵ Ũcuachi'a Jesucristo'te cuasache kũachũ'o ũcuarepare musanũkona apeasarũmũpi vũa, Repaũ pa'icheja sani re'oja'che pa'ijachere cuasajũ pojojũ cha'ajũ pa'ijũasome musanũkona. Musanũkona pãi oichena'me Diore cuasache'te asa, "Re'orepamũ, Ja'kũ", chiijũ pa'ime chũkũna Repaũ'te Diore. ⁶ Pãipi Jesucristo'te cuasache

kuachũ'ore chũ'vajũna cheja si'acheja pa'ina pãi asa chẽa na'a jainũko Jesuni cuasajũ jovo re'oja'che pa'ime chura. Mũsanũkona repachũ'o ũcuarepa Dios pãire oiũ cho'okaiche kuachũ'o asa chẽa Repaũ'te cuasajũ jovorũmũpi vũa pa'icheja'che re'oja'che pa'ime repaña. ⁷ Chũkũnana'me Cristo'te cho'оче masi cho'okaikũji chũkũna cuasakũ Epafrapi che'choasomũ jã'a mũsanũkonare. ⁸ Ũcuachi'a Dios Rekochoji cho'okaiũna mũsanũkona chekũnare oijũ re'oja'che cho'okaijũ pa'iche'te ra kuasi'kũa'mũ repaũ Epafras chũkũna'te.

⁹ Jã'ajekũna chũkũna mũsanũkona re'oja'che pa'iche asaumucusepi vũa cuhama'ñe Dioni sũekaijũ pa'ime, mũsanũkonapi Repaũ chũ'ore na'a rũa asa chẽajũ Repaũ chiiche'te peore masijũ, re'oja'che pa'imasia'jũ chini. ¹⁰ Jã'aja'ñe pani Maire Paakũ neena pa'iche pa'ijũ Repaũ chiiche'te si'arũmũ cho'ojũ chekũnani si'ache re'oja'che cho'okaijũ Ũcuauña'me na'a re'oja'che pa'ijanaa'me mũsanũkona, Repaũ pa'iche'te na'a rũa masijũ. ¹¹ Ũcuachi'a Repaũ'te Peore Masiũji Re'okũ'te sũekaime chũkũna mũsanũkonapi re'oja'che cho'o koka paaa'jũ chini. Ũcuachi'a mũsanũkonapi pa'imasiũ cu'ache ti'jñetojẽ'e jũvomasijũ, "Pani etajaiche cuasoma'ñea'me ie", chiima'ñe ũcua pojojũ re'oja'che paapũ chini sũekaime chũkũna. ¹² Jã'aja'ñe pani mũsanũkona mai Ja'kũ Diore pojojũ, "Re'orepamũ, Ja'kũ", chiijũ pa'ijanaa'me. Mũsanũkonare rekoñoã re'ojarekoñoã care'vakaisi'kũa'mũ Repaũ, Repaũ

neenare ĩsijachere Repau pa'ichejana sani kooa'jũ chini. ¹³ Mai vati chẽa paacojñonajejũ cu'ache pa'ijũ chijachejaja'che pa'isinare tua Dios Repau Mamakũni Repau rãa cuasakũni maini jo'kasi'kua'mũ, maipi Ũcuau chũ'uñe'te cho'oju paapũ chini. ¹⁴ Chura Dios mai cu'ache cho'osi'e jo'e cuasama'mũ, Cristo jũni ro'ikaisi'ejekũna.

Cristo jũni ro'ikaisi'ejekũna Diona'me re'oja'che pa'ire'oche'te kũamũ

¹⁵ Repau Cristo Dios Ñoma'kũja'iu maire Ñosi'kũ chareparo cakua'mũ. Chekũna vajũva'na ũcuanũko cho'je cho'ocojñosiva'naa'me. ¹⁶ Diopi chũ'uũna Repau Cristo peore cho'oasomũ. Chejana'me cũnaũmũ, repachejña pa'ichena'me repachejña pa'inare, ñoñena'me ñoma'ñe, ñonana'me ñomanare, pãi chũ'unana'me ángeles chũ'unana'me vati chũ'unare ũcuanũkore cho'oasomũ Repau na'a pa'isirũmũ repana ũcuanũko Repau'te ña pojoa'jũ chini. ¹⁷ Cheke peore chuta'a pa'imarũmũ Pa'ikũjekũ peore Paakũ chũ'ũkũ'mũ Cristo, re'oja'che paau chini. ¹⁸ Pãiu repau ca'nivũ'te paacheja'che Repau'te cuasakuanupũ'te paamũ Repau. Repauji cho'oũna pa'inaa'me mai. Ũcuachi'a peore chũ'ũkũ pasa chini charo jũni vajũraisi'kũasomũ Repau. ¹⁹ Repau Cristo Diopi chiiũna Ũcuauja'iujekũ Repau pa'iche peore ũcuaja'che pa'ikũ'mũ. ²⁰ Jã'aja'ñe Pa'ikũ'te chejana raoasomũ Repau, Repauji kurususẽ'verona jẽ'jocojño chie rao mai ũcuanũko cho'oche'te cu'are jũni ro'ikakũna maini ũcuanũkore

Ûcuauña'me re'oja'che pa'ire'oa'kũ chini, cheja pa'inana'me cunaũmũ pa'inare.

²¹ Aperũmũ musanũkona cu'ache cho'onajejũ rekoñoãpi Repaũni cuhejũ Repaũ paacojñomana pa'isinaa'me. ²² Jã'ata'ni irũmũ Jesucristo pãi ca'nivũ paakũ maire jũni ro'ikaisi'ejekũna Diona'me re'oja'che pa'ire'omũ maire. Maipi Repaũ chiiche re'oja'chechi'a cho'oju rekoñoã cu'achejẽ'e peojũ Repaũna'me pa'ijũ Repaũ neerepana paarũ chini jã'aja'ñe cho'okaniasomũ Repaũ. ²³ Jã'aja'ñe paũu chini Jesure cuasache cuhasoma'ñe ũcua cuasaju pa'ijũ'ũ. Ûcuachi'a musanũkona asa chẽa cuasache Jesucristo'te cuasache kũachũ'o kũache Repaũ re'oja'che ïsijache pojojũ cha'ache ũhasomanejũ'ũ. Repa chũ'o chũ'ũ Pablo chekũnana'me si'achejña ku'ũ chũ'vakũ pa'ikũ'mũ.

Diopi jo'kaũna Pablo Jesure cuasakuanupũ'te cho'okaiũ pa'isi'ere kũamũ

²⁴ Chura musanũkonani chũ'vakũ cu'ache ti'jñecoñokũta'ni pojomũ chũ'ũ. Jã'aja'ñe cho'ocojñokũ Jesucristoni cho'okaiũ Repaũ ca'nivũja'ñe pa'inani Repaũ'te cuasakuanupũ'te cho'okaiũ Repaũ cho'ocojñoñeja'ñe chũ'ũ ca'nivũji cu'ache cho'ocojñokũ cho'okaiũ pojomũ chũ'ũ. ²⁵ Diopi chũ'ũni musanũkonani Repaũ chũ'ore peore kũakaau chini jo'kaũna Jesure cuasakuanupũ'te cho'оче cho'okaiũ pa'ikũ'mũ chũ'ũ. ²⁶ Repa chũ'o rũa jeerũmũ aperũmũ kuamanesichũ'o irũmũna Diopi maini Repaũ neenani kũaũna ũcuare chũ'vamũ

chũ'ũ. ²⁷ Dios maipi Repaũ neenapi aperũmũ kuamanesichũ'ore judío peonani Repaũ chũ'o Jesucristo'te cuasache kuachũ'ore kuajũ paapũ chini jo'kasi'kua'mũ. Ija'che chiimũ repa chũ'o kuache: Jesucristoji maini ja'me pa'iũna Dios pa'ichejare sani pa'ijanaa'me mai.

²⁸ Chũkũna Repaũ Cristo pa'iche'te pãi ũcuanũkore kuajũ masi chũ'vajũ re'oja'che che'chojũ pa'inaa'me repanapi asa chẽa Repaũni cuasajũ jovo karama'ñe re'oja'che paapũ chini. ²⁹ Cristoji chũ'ũni cho'okaiũna chũ'va koka paakũ peore cho'ore'ochetũ'ka cho'okũ pa'ikũ'mũ chũ'ũ.

2

¹ Mũsanũkonapi masia'jũ chini kuamũ chũ'ũ ie: Mũsanũkonare Colosas vũ'ejoopo canare re'oja'che cho'okasa chini chekũna ũsetota'ni ũcua cho'okũ pa'ikũ'mũ chũ'ũ, ũcuachi'a Laodicea vũ'ejoopo pa'inana'me chũ'ũre chuta'a ñamanani. ² Mũsanũkonapi ũcuanũko ũcuate'e cuasajũ sãĩñechi'a oijũ pojojũ pa'ijũ Dios chũ'o kuache'te masirepa asa chẽa cuasajũ re'oja'che paapũ chini cho'okaimũ chũ'ũ. ũcuachi'a aperũmũ vesũsi'e Dios churana Raosi'kũ Cristo pa'iche'te masijũ ũcuauña'me re'oja'che paapũ chini cho'okaimũ chũ'ũ. ³ Repaũ Cristochi'aa'mũ maire Cho'okaikũ, maipi Dios chũ'o re'oja'chere karama'ñe asa masijũ re'oja'che paapũ chini. ⁴ Chekũnapi mũsanũkonani jorejũ re'oja'cheja'che i'kajũ te'euĩ'e cacũ'omanea'jũ chini i'kamũ chũ'ũ

jã'a. ⁵ Mũsanũkonare ja'me pa'ima'kũta'ni chũ'u rekochoji ja'me pa'icheja'che cuasakũ'mũ chũ'u. Mũsanũkona re'oja'che pa'ijũ Cristo'te masirepa cuasaju pa'iche'te asa rũa pojomũ chũ'u.

Cristo neena mama pa'iche'te kũamũ

⁶ Jã'ajekũna Maire Paakũni Jesucristoni cuasaju Repau neena paũu chini jovosinajeju Repau'te cuasache'te ũhasoma'ñe ũcua cuasaju re'oja'che pa'ijũ'u. ⁷ Repau'te ja'me pa'iche'te jo'kasoma'ñe mũsanũkonare che'chosi'ere Dios chũ'ore na'a rũa che'che Repau'ni na'a rũa masi cuasaju si'arũmu, "Re'orepamũ, Ja'ku", chiijũ pojojũ pa'ijũ'u.

⁸ Ñarepaju pa'ijũ'u; pãipi mũsanũkonani jorejũ chẽa paaũu chini repana peoche cuasache'te che'choju. Cristo pa'iche che'chomanaa'me repana. Rupũ pãi cuasachena'me pãi jeerũmu cho'osi'ena'me Diore cuasacuhena chũ'uñe'te che'chonaa'me repana.

⁹ Repau Cristo pãi ca'nivũ paasi'kũta'ni Diojekũ Dios pa'iche peore ũcuaja'che pa'ikũ'mũ. ¹⁰ Mũsanũkonare ũcuachi'a Cristoji ja'me pa'ũna Dios chiiche re'oja'che pa'ire'omũ, Cristoji pãi chũ'unare, ángeles chũ'unare, vati chũ'unare ũcuanũkore na'a rũa masikũna. ¹¹ Ũcuachi'a Cristo neenajeju rekoñoã Ũcuaũni re'ojarekoñoã care'vacojñosinajeju jĩkora'murũ chã'tirũ pa'ica'nirũ chũto tũacojñosinaja'ñe pa'ime mũsanũkona. Pãi cho'oche circuncisión ca'nivũã chũtocojñomanesina Cristoni circuncisión cho'ocojñosinaja'ñe pa'ime mũsanũkona

cu'arekoñoã Ûcuauñi re'ojarekoñoã care'vacojñosinajeju. ¹² Mũsanũkona Repau'te Dios vasosi'ere cuasaju okoro'vecojño aperũmu cu'ache pa'isi'ere jo'kaso Repau'na'me tãcojño vajũraisinaja'ñe pa'ijũ mama pa'ime chura.

¹³ Aperũmu mũsanũkona judío peona Ûcuauũko Dios pa'iche'te vesũju cu'are cho'oju Repau sējocojñosina pa'isinaa'me. Irũmũta'ni Dios mũsanũkonare Cristo cho'okaisi'ejekũna pa'iche mamare jo'ka mũsanũkona cu'ache cho'osi'e cuasama'mũ. ¹⁴ Aperũmu maire pãi Dioni pōsero'ire paajũna Repau aperũmu chũ'ũ jo'kasi'e cho'oche pa'isi'kua'mũ. Jã'ata'ni irũmũ Dios maire ro'ikakũna jã'aja'ñe cho'oche peomũ. Pãi cu'ache cho'osinare repaña cu'ache cho'osi'e ro'i kurususẽ'verona jẽ'jo repaña cu'ache cho'osi'ere kũajũ tocha sũome. Repa tochasi'e kũache cu'a jũni ro'isome repaña. Ûcuaja'che Cristo jũni ro'ikaisi'ejekũna mai pōsero'i tochasija'ova kurususẽ'verona jẽ'jo sũosi'ea'che cho'osi'ejekũna peore ro'isi'ea'me chura. ¹⁵ Repau Cristo mai cu'are ro'ikaiũ kurususẽ'verona jũni maire cu'ache chũ'ũnare cajejani repaña chũ'ũñe tuasokaniasomũ. Repa tuakaisi'e pãi jainũko masime.

Cristona'me jũni vajũraisinaja'ñe pa'iche'te kũamũ

¹⁶ Jã'ajekũna mũsanũkona pa'iche'te pãipi ña ãu ãiñena'me ũkuche te'emajñaruã ũseto jachajũ'ũ repañare. Ûcuachi'a Diore pojoju judío fiesta cho'oche'te chũ'ũju puau mucujña cho'oche cho'oche'te ũseju ke'reto jachajũ'ũ

repanare. ¹⁷ Jã'amajñaruã cho'oche maipi cho'ojũ che'che re'oja'che pa'ijachere cha'ajũ paaru chini aperũmũ chũ'ũ jo'kasi'ea'me. Jã'ata'ni repa re'oja'che pa'iche Jesucristo'te cuasajũ jovo pa'iche'me. ¹⁸ Angeleva'nare pojonapi ke'renare jachajũ'ũ. Repana rekoñoã, "Rũa masiũ'mũ chũ'ũ", chini cuasanata'ni pãipi asa ũcuana'ni pojoa'jũ chini, "Rũa vesũ'mũ chũ'ũ", chiime. Ũcuana cuasache'te kũajũ, "Dios ñoñe'te ñajũ kũame chũkũna", chiijũ jorejũ, meñe rũa pojonaa'me repana. ¹⁹ Cristo'te mai rekochoja'che pa'ikũ'te cuasache jo'kasosinaa'me repana. Maita'ni Repau neerepanajejũ Repau ca'nivũja'ñe pa'inaa'me. Diopi chũ'ũkũna mai rekochoja'che pa'iu maire si'arũmũ cho'okaiũ pa'ikũ'mũ Repau, maipi na'a rũa che'chejũ si'arũmũ na'a re'oja'che paaru chini.

²⁰ Chura mũsanũkona Cristona'me jũnisosinaja'ñe pa'ijũ Repau'te cuasamana pa'icheja'che pañu chiimanaa'me. Jã'aja'ñe pa'inata'ni, ¿je'se pa'ina repa chũ'ũñe chuta'a cho'ouache cuasache? ²¹ Ija'che i'kajũ si'ache chũ'ũnaa'me repa: "Chẽamanejũ'ũ jã'amajñaruã; ãimanejũ'ũ jã'amajñaruã; jã'ajamajñaruã miimanejũ'ũ", chiinaa'me. ²² Peore jã'amajñaruã sẽ'sevũ cho'omajñaruã rupũ pãi cuasajũ chũ'ũñejekũ si'asojachea'me. ²³ Chekũrũmũ pãi jã'are cho'ojũ chekũnapi ñato re'oja'cheja'che ñoñe pa'ime. Chekũrũmũ rũa masinaja'ñe pa'ijũ, Diore rũa pojonaja'ñe pa'ijũ, meñe pojoma'ñeja'ñe pa'ijũ cu'ache cho'oche ãsejũ na'a rũa ãsejũ pa'inaa'me repa. Repana

jã'amajñaruãchi'a cho'ona repa na rekoñoã cu'ache cho'ouache cuasacheta'ni jãvoma'ñe ũcua cho'oju pa'inaa'me.

3

¹ Cristona'me jũni vajuraisinaja'ñe pa'iju re'oja'che pa'inaa'me m̃sanukona. Jã'ajekuna Dios pa'icheja sani pa'ijache cuasana pa'iche pa'ijũ'ũ. Repaũ Cristo ũcuachejare pa'iu Diore kueñe uajajũtucakã'kore ñu'iu chũ'uku pa'iuasomũ. ² Cheja pa'imajñaruãchi'a cuasaju pa'ima'ñe cunaũmũ pa'iche'te na'a rua cuasaju pa'ijũ'ũ. ³ Cristona'me jũnisosinaja'ñejeju rekoñoãpi Ũcuauña'me pa'iju Dios neena'me m̃sanukona. ⁴ Ũcuauji Cristo m̃sanukonare pa'iche mamare ĩsisi'kua'mũ. Repaũ jo'e rairũmũ Ũcuaujana carũni Repaũna'me chũ'uju pa'ijanaa'me m̃sanukona.

Aperũmũ pa'isi'ena'me mama pa'iche'te kũamũ

⁵ Jã'aja'ñejeekuna m̃sanukona cu'arekoñoã cu'ache cho'ouache cuasache'te peore jãvoju ũhasojũ'ũ, ija'chere: rãjoromi peonare romineeñe, ũjũpãi peonare uũmũneeñe, vajuchuache cho'ochẽ, cu'a cho'oneeñe, cu'ache ũcuauache cho'ochena'me kurineeñe. Pãĩ kurineena kurichi'a cuasanajeju Diore cuasama'ñe tũosiva'nare pojocheja'che cho'ome. ⁶ Jachaju jã'amajñaruã cho'onare pãĩ pe'rukũ cu'ache ti'jñeñe chũ'uja'mũ Dios. ⁷ Aperũmũ m̃sanukona ũcuachi'a jã'amajñaruã cho'oju pa'isinaa'me. ⁸ Jã'ata'ni jã'aja'ñe cho'ochẽ'te

peore masirepa ũhasojũ pa'ijũ'ũ chura: pe'ruche, teache, chekũnare cu'ache cho'oche, chekũnare cu'ache cutuchena'me vajũchũache i'kache. ⁹ Ũcuachi'a sãĩnechi'a jorejũ pa'imanejũ'ũ, ũcuare aperũmũ pa'isi'ena'me cho'osi'e jo'kasosinajejũ. ¹⁰ Chura mũsanũkona rekoñoã mamarekoñoã care'vacojũnosinajejũ pa'iche mamare pa'ime. Dios maire cho'osi'ku si'arũmũ cho'okaiũ pa'imũ, maipi Repaũ pa'iche'te masijũ Ũcuau pa'icheja'che si'arũmũ na'a re'oja'che paapũ chini. ¹¹ Jã'ajekũna chura ija'che cuasama'ñe paũ: griegopã pa'ichena'me judíopã pa'iche, jĩkora'murũ chã'tirũ pa'ica'nirũ chũto tũacojũnosina pa'ichena'me cho'ocojũnomanesina pa'iche, pãirepa pa'ichena'me tĩipã pa'iche, chẽa paacojũnana pa'ichena'me chẽa paacojũnomana pa'iche. Jã'aja'ñejẽ'e cuasama'ñe Cristo neena pa'ichechi'a cuasajũ paũ mai. Peore Paakũji maire ũcuanũkore paakũ'mũ Repaũ.

¹² Dios mũsanũkonare Repaũ neena paapũ chini oiũ chẽa paamũ. Jã'ajekũna pa'iche mama pa'inajejũ chekũnare pãĩ oirepache oijũ re'oja'che cho'okaijũ, "Na'a rũa masikũ'mũ chũ'ũ", chiima'ñe, pe'kerũ pa'ijũ pe'ruma'ñe pa'ijũ'ũ. ¹³ Sãĩnechi'a ke'rema'ñe pa'ijũ, mũsanũkonare chekũna cu'ache cho'oche cuasamanejũ'ũ. Dios mũsanũkona cho'oche cu'a jo'e cuasama'ñeja'ñe chekũna mũsanũkonare cu'ache cho'oche jo'e cuasamanejũ'ũ. ¹⁴ Jã'aja'ñe cho'oju ũcuachi'a chekũnare oijũ si'arũmũ re'oja'che cho'okaijũ pa'ijũ'ũ. Jã'aja'ñe cho'oju

pani re'oja'che ja'me pa'ijanaa'me mʉsanʉkona.
 15 Cristoji cho'okaiʉna mʉsanʉkona rekoñoã re'oja'chechi'a pa'ijũ'ʉ. Ũcuachi'a Cristo ca'nivʉ ũcuate'eca'nivʉja'ñe pa'inajejʉ rekoñoãpi re'oja'che pa'ijʉ ũcuʉnʉko re'oja'che ja'me pa'ijũ'ʉ. Jã'aja'ñe paapʉ chini chẽa paamʉ Dios maire. Ũcuachi'a si'arʉmʉ pojojʉ, "Re'orepamʉ", chiijʉ pa'ijũ'ʉ Repaũ'te. 16 Cristo chũ'ore asa chẽa si'arʉmʉ cuasajʉ sãĩñechi'a masi che'chojʉ re'oja'che chũ'vajʉ pa'ijũ'ʉ. Dios mʉsanʉkonare cho'okaiche'te cuasajʉ Repaũni pojojʉ Dios ujare ujajʉ pa'ijũ'ʉ. 17 Mʉsanʉkonari cho'omajñarũãre ũcuʉamajñarũãre cho'oni jã'apãani chũ'o cutuni si'arʉmʉ Maire Paakʉ Jesús neena pa'iche pa'ijʉ re'oja'che pa'ijũ'ʉ. Ũcuachi'a Ũcuʉji cho'okaiʉna si'arʉmʉ mai Ja'kʉni Dioni, "Re'orepamʉ, Ja'kʉ", chiijʉ pa'ijũ'ʉ.

Ũcuʉnʉkore chũ'vache'me

18 Rũjoromi, mʉũjʉpãi chũ'ũñe jachama'ñe cho'ojʉ pa'ijũ'ʉ. Maire Paakʉ'te cuasana pa'iche'me jã'a. 19 Ūjʉpãi, mʉrũjoromi oijʉ repanare pa'ivesache cho'oma'ñe re'oja'che cho'okaijʉ paajũ'ʉ.

20 Chĩi, mʉja'kupãi chũ'ũñe jachama'ñe peore cho'ojʉ pa'ijũ'ʉ. Jã'aja'ñe cho'ojʉ pa'inare pojomʉ Maire Paakʉ Dios. 21 Pʉka'kupãi, mʉsanʉkona chĩiva'nare rʉarepa cuajare chũ'ujʉ pa'imanejũ'ʉ, repanari pe'rujʉ, "Pani etajani re'oja'che pa'i cuasoma'ñea'me ie", chiimaneajʉ chini.

22 Chekunare chēa paacojñova'na, icheja cheja pa'irumũ musanukonare paana chũ'uñe jachama'ñe peore cho'oju pa'ijũ'u. Repanapi ña pojoa'ju chini repaña ñarumuchi'a re'oja'che cho'oju pa'ima'ñe, ũcuarepa pa'ijũ Dioni cuasa, vajuchũju, repaña ñamarumujẽ'e repaña chũ'uñe masi cho'oju pa'ijũ'u. 23 Musanukona cho'oche ũcuauache'te cho'oni rupũ pãire cho'okainaja'ñe cho'oma'ñe masi cho'ouache cuasaju Maire Paaku'te cho'okaicheja'che cuasaju cho'oju pa'ijũ'u. 24 Musanukonapi re'oja'che cho'oni Maire Paakũji ñsikũna rũa re'oja'chere koojanaa'me, re'oja'che cho'osi'e ro'i. Cristoa'mũ musanukonare Paarepakũ. ũcuauũni cho'oche cho'okaiju pa'ime musanukona. 25 Jã'ata'ni cu'ache cho'ona Diopi te'enare na'a rũa oima'ñe ũcuapa'rũvachi'a oiũ cuasakũna ũcuauũko repaña cu'ache cho'osi'e ro'i ro'ijanaa'me.

4

1 Chekunare koo paana, musanukona paanare cu'ache cho'oma'ñe re'oja'che paajũ'u, iere cuasaju: Maire Paaku Dios Cũnaumũ Pa'ikũ musanukona cho'oche peore ñaku'mũ.

2 Si'arumũ ũcuauũko Dioni sēeju pa'ijũ'u. Ñarepaju pa'ijũ Repaũni pojoju, "Re'orepamũ, Ja'ku", chiiju pa'ijũ'u. 3 Chũkana'te ũcuachi'a Repaũ'te sēekaijũ'u ũcuauũji cho'okaiũna pãipi Dios chũ'o chũkana chũ'vachũ'ore asaa'ju chini. Chura, repa chũ'o Cristo pa'iche aperumũ kuamanesichũ'o chũ'vakũjekũ pãi chēavũ'ere

pa'imũ chũ'u. ⁴ Ũcuachi'a chũ'ũpi Repaũ chi-iche'te cho'okũ Ũcuau chũ'ore asamasire'oche chũ'vakũna pãipi asa chẽaa'jũ chini, sêekaijũ'u Repaũ'te.

⁵ Masi cuasajũ Diore cuasamanare re'oja'che ja'me pa'ijũ'u. Repanare chũ'vare'orũmũ si'arũmũ chũ'vajũ pa'ijũ'u va'sesomaneũ chini. ⁶ Repanare cutuni si'arũmũ re'oja'chere asare'oche i'kajũ pa'ijũ'u, pãipi mũsanũkonani Dios pa'iche'te sêeto i'kamasiũ chini.

Tocha pi'ni chũ'o saosi'ea'me

⁷ Mai majapãiuja'iu chũ'u cuasakũji Tíquico chũ'u pa'iche'te sa kũaja'mũ mũsanũkonare. Maire Paakũ'te chũkũnana'me cho'oche rũa masi cho'okaiũ pa'ikũ'mũ repaũ. ⁸ Jã'ajekũna mũsanũkona pa'ichejana saomũ chũ'u repaũ'te sa kũaũna chũkũna pa'iche'te asa masijũ na'a rũa pojojũ paapũ chini. ⁹ Mai majapãiuja'iu mai cuasakũ Onésimo mũsanũkona pa'icheja cakũ ũcuau'na'me saimũ. Maire Paakũ'te Jesure cuhasoma'ñe cuasakũ pa'ikũ'mũ repaũ. Repana ka'chana sani icheja cho'ocojũñoñe peore kũajanaa'me mũsanũkonare.

¹⁰ Aristarco chũ'ũna'me ivũ'e pãi chẽavũ'e pa'ikũ ja'me chũ'o saomũ mũsanũkonare. Bernabé majapãiu Marcos ũcuachi'a chũ'o saomũ mũsanũkonare. Aperũmũ chũ'u mũsanũkonare, "Repaũji mũsanũkona pa'icheja sani ñato pojojũ re'oja'che cho'okaijũ'u repaũ'te", chiiũ chũ'vakũ chũ'o saosi'e asaasome mũsanũkona. Jã'ajekũna chura jã'aja'ñe cho'okaijũ'u repaũ'te. ¹¹ Jesús Justo ũcuachi'a

chũ'o saomũ mũsanũkonare. Repanachi'a judíopãi Jesucristo'te cuasana chekũnapí Dios chiiche'te cho'ojũ paapũ chini chũ'ũna'me chũ'vame. Chekũna judíopãi Jesucristo'te cuasanata'ni Dios chũ'o chũ'vama'me. Chũ'ũ sũma'ñe cuasakũ oirũmũ ũcuana re'oja'che pa'iche'te cuasani na'a pojokũ pa'ikũ'mũ chũ'ũ. ¹² Mũsanũkona pa'iche'ja cakũ Epafras ũcuachi'a chũ'o saomũ mũsanũkonare. Jesucristo'te cho'oche cho'okaiũ pa'ikũ'mũ repaũ. Mũsanũkonare si'arũmũ Diore sũekaiũ pa'imũ repaũ, ũcuauji cho'okaiũna Repaũ'te cuasache'te ũhasoma'ñe masi cuasajũ Repaũ chiichechi'a cho'ojũ paapũ chini. ¹³ Repaũ Epafras mũsanũkonana'me Laodicea vũ'ejoopo pa'inana'me Hierápolis vũ'ejoopo pa'inare cuasakũ rũa oiũ cho'okaiũ pa'iche ñakũjekũ kũamũ chũ'ũ. ¹⁴ Lucas, ũko cho'omasi ai, mai cuasacojñokũ chũ'o saomũ mũsanũkonare, Demas ũcuachi'a.

¹⁵ Laodicea vũ'ejoopo pa'inare mai majapãijanare chũ'o sa kũakaijũ'ũ. Nínfa'te ũcuachi'a chũ'o kũakaijũ'ũ, repao vũ'e Jesure pojojũ chi'ikuanupũ ũcuachi'a. ¹⁶ Ija'ova utija'ova tochasi'e ña pi'ni Laodicea vũ'ejoopo pa'inani Jesure cuasakuanupũna saojũ'ũ ñaa'jũ. Mũsanũkona ũcuachi'a chũ'ũ repanare tocha saosija'ova ñajũ'ũ. ¹⁷ Arquipo'te ija'che i'kakaijũ'ũ chũ'ũre: “Mũ'ũpi cho'oa'kũ chini Maire Paakũ jo'kasi'e peore masi cho'o pi'nijũ'ũ”, chiiijũ'ũ repaũ'te.

¹⁸ Chũ'ũ, Pablo, inũkorũ chũ'o saomakarũchi'a chũ'ũrepaũji tochamũ. Chũ'ũ pãi chẽavũ'e

pa'iche cavesuma'ñe cuasajũ'u. Diopi
masanukonare raa re'oja'che cho'okaan.
Re'omũ.

Pablo

Dios Chu'o Kuaphuro
Koreguaje: Dios Chu'o Kuaphuro New Testament
copyright © 2009 Wycliffe Bible Translators, Inc.

Language: Koreguaje

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022
87a345ac-83c6-51ad-8750-17a703f38bcc